

■ COLUMNA

Filar patratgs

DAD AITA DERMONT-STUPAN

A tgnamain ma plaschi da scriver. Jau hai adina scrit per mai en quaderns ed en cudeschs alvs. Insacura hai jau er gughegià da publitgar in text u l'auter per betg restar me mia suletta cun mes patratgs. Jau admir las scripturas ed ils scripturs che san star vidlunder. L'idea dad esser er jau scriptura ma plaschess. I ma plaschess da scriver en nossa gassetta rumantscha surregionala. U forse perfin da scriver in roman che vegniss legì en tut la Rumantschia. Sche jau sun magari insanua en gir u sche jau fatsch insatge auter datti muments che jau sai m'imaginar: quest pudess jau scriver.

Ma jau na scriv betg. Cur ch'i vegn il mument che jau stuess seser



giu, metter il chau a pitg e scriver, na funcziuni betg. Jau na tschif betg il fil.

Trais giadas hai jau ussa già manchentà il termin per mias columnas. Jau cumenz in tema e mes patratgs van en sgurdibels che jau na vegn betg ad ina fin. Jau m'agit che jau na vegn betg da formular quai che jau less dir. Ma jau prend er adina temas che m'agitan! Insaco cartess ins

che per buns texts stoppian ins er s'agitar; che pir in pèr daguts fel dettian al text la fermezza giavischada.

S'agitar dal mund. S'agitar da la politica. S'agitar dals Rumantschs... Na, s'agitar na gida nagut. Fa insatge encunter! Scriva! Mo sche jau na sai betg! – Sche ti na sas betg scriver, sche lascha star, ma di jau pia. Basta.

Ve, mia roda da filar, dain gas. Filain in paunus duas, ti mulinè malniz ed jau. Tes girar regular ma quieta. Ti filas mes patratgs. Questa nivla da launa, libra, leva, loma, lucca, falombra sa storscha e sa zuglia cun il gir da l'ala ad in fil resistent.

Ah, ussa hai jau chattà il fil.